

Ekwo Mayika Onye Mpfuchiru Chileke

¹ Owaa bu ozi, Chipfu ziru Mayika; onye shi le mkpukpu Moreshetu; teke Jiótamu bu eze ndu Jiuda; yele teke Éhazu bu eze, ndu Jiuda kwapho; wakwapho teke Hezekáya bu eze, le Jiuda ono. O kwa ophulenyá, o phuru l'opfu ehu ndu mkpukpu Samériya yee ndu mkpukpu Jierúsalemu.

² Unube ndiphe;
 unu numakwa-o!
 Ge mgboko l'opfu ngabekwa
 nchi;
 mekpoo onyemonye,
 bu iya nu!
 Ge Nnajiuphu, bu Chipfu
 gbekwa l'eze-ulo iya,
 du nsọ gbaa unu
 ekebe.

*Ikpe, eekpe ndu Samériya
 yee ndu Jierúsalemu*

³ Sụ-a; lekwa! Chipfu shikwa
 l'eka o bu ebubu abya.
 Oo-bya bya azoo garamu
 garamu l'eli-úbvú
 l'eli-úbvú, nọgbaa l'eliphe.
⁴ Úbvú úbvú ono a-zashihu

Ị Ị mkpula ọkpa iya;
 nsuda nsuda
 agbawashihuchaa
 agbawashihu
 g'ụnwù, e doberu Ị
 mgboru ọku; gẹ mini,
 shi Ị mgbaze asoshihu.

⁵ Iphemiphe-a bukota iphe, kparu iya nu bu atupya, oshilokpa Jiekopu tupyaru Chileke; mbu iphe-eji, ndu onu-ulo Izurelu meru. ?Bu onye be uta duru Ị Jiekopu tupyaru Chileke? ? Tobudu ndu mkpukpu Sameriya? ?Bu onye be uta duru Ị ndu Jiuda meru iphe-eji? ? Tobudu ndu mkpukpu Jierusalemu? ⁶ “Noo g'o gude mu je emee mkpukpu Sameriya ikpozu; eka aa-nodu akoje opfu-vayinu. Mkpuma igbulo iya be mu a-chiru ye Ị nsuda ono. Mu emee g'okpa-ulo iya zekposhihu gheru onu. ⁷ Iphe, bu ntekpe, ndu Sameriya doberu be ee-tsu yogiri yogiri. Iphemiphe, aapfuje phe l'ulo nshi be ee-tsukota oku. Teme mu abya emebyishikota iphemiphe, o kpuru akpukpu dobe agwa agwagwa. Noo kele iphe ono, onoduje anako ono bukota l'eka o shi bu l'ugwo, aapfuje unwanyi-ukpara. O bukwarupho g'aakpakaje ugwo, aapfuje unwanyi-ukpara bu g'aa-kpaka iya.”

Ara ekwa; waa agu aphu

⁸ Oo iphe ono meru g'o gude mu je ara ekwa chia mkpu. Mu a-gbaru okpa oto; gbaru ehuru oto. Mu a-kwa phuuphuu ge nkuta-oswa. Mu arakwapho aphu-aphu ge mgbashi-ujiku; ⁹ kele onyá, aba mkpukpu Sameriya taa ladu alala; teme

ọ baswewaru ndu Jiuda. O jerwuakwaru ọnu-abata, e shi ejepfu ndibe mu; mbụ jerwuchaa Jierúsalemu l'onwiya.

¹⁰ Unu te epfukwaru iya ndu mkpụkpu Gatu! Ọphu unu arakwa ẹkwa arara ophu! Unubẹ ndu mkpụkpu Bẹtu-Ọfura; unu gwo-phua onwunu l'urwuku! ¹¹ Unubẹ ndu bu ọ mkpụkpu Shafiya; Unu gbaru ọto gude iphere je iphe, unu eje! Ndu ọphu bu ọ mkpụkpu Zananu taa fụtakwa afuta. Ndu mkpụkpu Bẹtu-Ezẹlu bẹ aphụ tsokwaru; noo kele iphe, shi gbobuta phẹ nụ bẹ a nafuakwaru. ¹² Mbụ ọ meji atofukwa ndu bu ọ mkpụkpu Marotu atofu ẹka ẹphe nọ ele ẹnya iphe, dụ ree; kele ejophe shiakwa Chipfu l'ẹka byarwuta ọnu-abata mkpụkpu Jierúsalemu. ¹³ Unubẹ ndu bu ọ mkpụkpu Lakishi; unu kwakọbe ụgbo-inya unu k'ogu! Ọ kwa unubedua vuru ụzo gbube ishi iphe-eji; ndu nwada Zayonu tsoahaa ẹka unu; kele atupya, ndu Ízurelu tupyaru mu bu ngu bẹ o shi l'ẹka. ¹⁴ Ọo ya bu g'ị kwaru ivu-ulo nụ ndu mkpụkpu Moreshetu-Gatu. Ndu mkpụkpu Akuzibu l'e-me ndu eze ndu Ízurelu mkpurukpuru-ẹnya.

¹⁵ Mu a-chita ndu a-bya emekpee unubẹ ndu bu ọ mkpụkpu Maresha. Ndu Ízurelu ndu ọphu aakwabeje ụbvù a-gbaru laa l'ogba Adulamu je ewohaa onwophe. ¹⁶ Unu kpushia ishi; ghebe ishi ọnu; nọdu l'aphụ unwegirima ono, dụ unu l'obu ono! Unu mee ishi g'ọ chaa unu swarishwari gẹ k'udele; kele ee-mechaa naa phẹ unu kpua phẹ ọ ndzu.

2

Iphe, Chileke abya ememe; yẹe ọphu nemadzụ abya ememe

¹ Aphụ a-tsokwaru ndu ono, achị idzu iphe, adudu ree; mbụ ndu anọduje l'iphe-azẹe phẹ ari k'eme ejo-ememe. Nchi -bohuepho; ephe awata iya ememe; kele ike, ephe e-gude eme iya du phẹ l'eka. ² Ephe achabeje ọnya l'alị onye ọzo; naa ya l'okpehu. Teke ephe chaberu ọnya l'ulo; ephe anakwaa ya pho l'ehuka. Ephe nọdu anatajẹ nemadzụ unuphu ibe iya; mbụ naa obutobu phẹ iphe, bụ okiphe iya.

³ Noo g'o gude Chipfu sụ: "Lenu; mu achiru ndu ono idzu ejo-iphe. Ọphu ephe a-dudu ike anahụ ejo-iphe ono agbala. Unu te ejehekwa etse etsetse kele teke ono a-du ejo eji. ⁴ Lẹ mbọku ono bẹ ndiphe a-nọdu eme unu iphe-ochi. Ephe emee unu kwaphukwaphu aguru unu ebvu-aphu-a:

"E mebyishikọtaakwaru anyi
rengurengu.

Okiphe ndibe mu bẹ e woru
kee.

Chipfu nataru mu iya l'eka!
O woru alị anyi nuchaa ndu
amadụ iya nụ."

Ndu mpfuchiru, epfu iphe, Chileke epfuduru

⁵ Oo ya bụ l'unu te enweedu mẹ onye lanu, a-nọ-chi ọnya unu lẹ ndzukọ kẹ Chipfu; onye a-tu ido gude kee alị ono.

⁶ Ndu mpfuchiru phẹ asuje: "Unu ta asujeshi l'ọ Chileke pfuru udu iphe ono, unu epfu ono. Ọ

tọ dukpodaa iphe-iphere, byaru eme anyi.” ⁷ Sụ-a; gube ọnu-ulo Jiékpọ; ?l'aa-sụ lẹ Unme Chipfu bẹ ẹhu eghu eghu tọo? ?Oomeje ẹgube iphe ono tọo? Opfu mu ?too mejeduru onye ọzo iya pfuru nhamunha iphe, dụ ree tọo?

⁸ Ọ gbẹ buru gẹ mbọku abvuwaa abvubvu bẹ ndibe mu wu-lihuru buru ndu ọhogu mu. Unu yefuchaa phẹ akpawuru-uwe ndu eze, ẹphe yeru; mbu ndu tuzoshihuru ẹhu aghatakpooro gẹ ndu shi ọgu alwa. ⁹ Unu achifuje unwanyi ndibe mu g'ẹphe te ebuhẹ l'ẹguru ibe phẹ. Unu anajẹ unwu phẹ iphe, bu iphe, dụ ree, shi mu l'ẹka. ¹⁰ Unu gbalihu tugbua lufu; kele ẹka-a ta abudu ọkpoku unu; kele e merwuwaru iya emerwu. E mebyishiwaru iya; k'ọphu e tee mekwatabaedu iya.

¹¹ Ọ -buru l'ọ duru onye tsoru aghaphe epfu mkpokoro opfu adzushi ọka eye iya sụ lẹ Chileke suru g'a nguje mee-mini yee mee mbekee ngushi iya ike; noo ẹgube ndu epfu iphe, dụ unu ree anuma bu onoya!

Ekwe nwanu wafuru nu ukwe ndzota

¹² “Ọ tọ dukwa iphe, e-me gẹ mu ta atuko g'unu ha chikobe; unubẹ oshilokpa Jiékpọ! Ọ tọ dukwa iphe, e-me gẹ mu ta achikobe unubẹ nwanu wafuru nu l'ọnu-ulo Ízurelu l'ẹka lanu! Mu a-chikota phẹ g'ẹphe nokobe l'ẹka lanu g'onye chiru aturu ye l'ulo aturu; g'onye doberu eghu yee aturu l'ẹka ọ nọ ata nri. Ẹphe e-ji ẹka

ono pyimu pyimu atụ wọwoowoo kele ẹphe a-pa igwerigwe. ¹³ Onye e-gbuharu pẹ ụzo ọsa l'a-buru onye e-vutaru pẹ ụzo. Ẹphe e-chikaa ọnu-abata mkpukpu ono wughata wufu. Onye eze pẹ evuru pẹ ụzo ghataada. Mbụ l'ọo Chipfu a-buru pẹ ivuzọ."

3

Mba aabaru ndu-ishi ẹphe lẹ ndu mpfuchiru

¹ Noo ya bụ; mu sụ: "Unu ngabẹ nchị; unubẹ ndu bụ ndu-ishi oshilokpa Jiékọpu; mbụ unubẹ ndu bụ ndu-ishi l'ọnu-ulo Ízurelu. ?Tọ gbaduru g'unu a-maru g'ekpeje ikpe, pfuru ọto tọo? ² Mbụ unubẹ ndu kporu iphe, dụ ree ashị; bya eyee ejo-ememe obu; ndu anọduje aswa ndibe mu akpọ; bya akpa pẹ anụ l'okpu; ³ unubẹ ndu ata anụ ndibe mu; bya aswa pẹ akpọ; bya etsu okpu pẹ yọgiri yọgiri; ndu ebushije anụ pẹ sẹsee g'anụ, aabya eye l'ochi; mbụ g'anụ aabya adẹ l'ite?"

⁴ E -mechaa; ẹphe araku Chipfu; ọle o too yeduru pẹ ọnu. Teke ono bẹ oo-woharu pẹ iphu iya. Ọ buru iphe, a-kpa iya nụ bụ l'ẹphe mewaru ejo-ememe.

⁵ Wakwa iphe, Chipfu epfu baa: "A -bya l'opfu ẹhu kẹ ndu mpfuchiru Chileke, bụ ndu ono, edusweshi ndibe mu ono; mbụ ndu abujeru: onye nuru pẹ nri; ẹphe agoru ẹhu-guu nụ iya. Teke ọ dudu iphe, a nuru pẹ; ẹphe akwakọbe etso onye obu ọgu. ⁶ Noo g'o gude nchi je l'ejipfu unu. Ọphuleny a nahụ unu; ọchii erikpute unu.

Ike agba eja taa duedu unu. Mbụ l'enyanwu anyihuru ndu mpfuchiru ono. Echi-eswe aburu phe tsukiribaa. ⁷ Ndu aphuje ophulanya be iphere e-mechaa du. Ndu agba eja aburu ndu e kpuru iphu le ntụ. G'ephe ha e-mechaa tuko kpuchia eka l'iphu kele Chileke te eyejeeduru phe onu."

⁸ Obenu le mbedua be ike jikporu mu ehu pyimu pyimu. Unme ke Chipfu jiru mu ehu; yee ekpe ikpe, pfuru oto; yee ike-okpu, mu e-gude karu oshilokpa Jiekopu emeswe, o mesweru; mbu karu oshilokpa Izurelu iphe-eji phe. ⁹ Unu numakwa iphe-a; unube ndu-ishi onu-ulo Jiekopu; mbu unube ndu bu onyibe l'onu-ulo Izurelu; ndu-ikpe, pfuru oto du ashi; teme ephe nodu emeje iphe, pfuru oto l'o gbee nggo; ¹⁰ ndu gude egbu ochi gude kpu mkpukpu, no l'eli ubvu Zayonu; mbu gude eme ejo-iphe kpu mkpukpu Jierusalemu. ¹¹ Ndu-ishi phe bu a -nuada phe iphe-uphalazu teme ephe ekpee ikpe. Ndu-ishi-uke phe nodu ezije iphe me a -pfuada phe ugwo; teme ndu mpfuchiru phe nodu agbaje eja me a -nuada phe okpoga. Ole ephe tukokwaru-a dakobe Chipfu epfu su: "Chipfu nokwa l'echilabo anyi; ophu o dukwa ejo-iphe, byaru adapfuta anyi."

¹² Oo ya bu l'oo unu kparu iphe, ee-mechaa ko ubvu Zayonu kofu g'aakoje opfu-a. Mkpukpu Jierusalemu e-mechaa buru ikpozu. Eli ubvu ono, bu eka eze-ulo Chileke du ono; e-mechaa buru eka egbudu zechiru.

4

Ehu-guu ojejoje
(Azá 2:2-4)

- ¹ Sù-a; o -rwua teke ikpazù
 bẹ ee-me g'eli úbvú ono,
 a kpuru eze-ulo Chileke
 onó nguru anguru;
 mee ya l'ọ buru iya
 a-kachaa shii l'iphe,
 bukpuo úbvú ọzo
 nọgbaa nu.
- Mbù l'ee-me iya g'ọ kakọta
 úbvú ọzo l'eli.
- Noo teke ndiphe a-nọdu
 awu awu-pfu iya.
- ² Ikpoto ọha a-bya bya asu:
 “Unu bya g'anyi je l'eli
 úbvú kẹ Chipfu!
 Unu g'anyi je l'ulo kẹ
 Chileke kẹ Jiékpọpu.
 Ọo ya e-zi anyi ọzo iya;
 k'ọphu anyi a-wata
 etso ọzo, ọ tọru.”
- Noo kẹle ekemu e-shi l'úbvú
 Zayonu futa;
 mbù l'opfu Chipfu e-shi lẹ
 mkpukpu Jierúsalem.
- ³ Ọo ya e-doshi opfu,
 dọgbaaru ikpoto
 nemadzù.
- L'ọ bya edoshiaru ọha,
 ike dọgbaa, bugbaa
 ọzenya ọzenya opfu,

duru phẹ nu.
 Ẹphe e-woru ogu-echi
 phẹ
 kpukwaa l'ọ buru ọgu;
 woru arwa phẹ kpua
 l'ọ buru mma nshii,
 e gude akocha iphe.

Ọ tọ duedu ọha,
 a-patakwadu ogu-echi
 ejepfu ọhozo ọgu;
 ọphu ẹphe anwuedu
 alwu ọgu ọzobaa.

⁴ Onyemonye a-nọduje
 ẹ mkpula vayinu nkiya;
 mekwapho ẹ mkpula oshi
 figu nkiya;
 ọphu ọ dudu onye byaru
 eye phẹ ebvu;
 kele ọ kwa Chipfu,
 bu Okalibe-Kakota-Ike
 eepfu iya.

⁵ Ohamoha ọzo g'ẹphe ha a-nọdukwaro ejeg-
 baa l'ọbvụ; agwa nshi phẹ; obenu l'anyibedua
 bu onye anyi e-gude ẹpha iya eje bu Chipfu, bu
 Chileke anyi jasụ l'ojejeje.

Iphe, Chipfu chiru k'ememe

⁶ Wakwa iphe, Chipfu epfu baa: “O -rwua
 mboku ono be mu a-chikobe ndu eniyeni; mu
 achikobe ndu a chifuru l'alị phẹ; yee ndu mu
 meru; ẹphe je iphe-ẹhuka. ⁷ Ndu eniyeni be mu
 e-me g'ẹphe buru ndu waru nu. Mu emee ndu
 a chifuru l'alị phẹ g'ẹphe buru ọha, ike du. Ọ

buru Chipfu a-buru eze phe l'eli úbvú Zayonu e -shi mboku ono jasú l'ojejoje.

⁸ “A -bya le gube nwada Zayonu, bu eka a no eche ndu Ízurelu g'onye eche aturu-a; bya aburu eka ndu Ízurelu agbabaje je ezeeru ndzu; ii-mechaa buru ishi g'i shi buru teke ndiche; mbu l'aburu eze e-mechaa rwubebaa gube nwada Jierúsalemu ozobaa. ⁹ ?Bu gunu kparu iphe, iira eka? ?Ti nwehedu onye eze to? Onye akpo-ziru ngu uzo; ?o lawaru l'iswi to? mbukwanu meru g'o gude iphe-ehuka gudeshia ngu ge nwanyi, ime eme. ¹⁰ Gube nwada Zayonu; nodunu chi gburugburu ge nwanyi, ime eme; kele nta-a be iibyakwa aha oma mkpukpu-a je akwaa l'oma egu. Ii-je ali ndu Babilonu. O buru eka ono be aa-nafuta ngu. Oo l'eka ono be Chipfu a-gbata ngu l'eka ndu ohogu ngu. ¹¹ Nta-a be ikpoto oha, du igwerigwe chikoberu onwophe bya etsoo ngu ogo. Epe nodu epfu su: 'G'a turwua ya! G'anyi chiru enya yeru Zayonu!' ¹² Obenu l'ephe ta amadu iphe, bu oriri Chipfu. Iphe, o chiru idzu k'ememe te edoduru phe enya; mbu onye ono, chikoberu phe g'onye chikoberu bali eje echichi ono.

¹³ “Gbalihu chia bali; gube nwada Zayonu; kele mu e-me g'i fua mpu-igwe. Ichirupfu-okpa ngu aburu onyirubvu. Li zo ikpoto oha tolitoli. Li woru urwu ono, epe ritaru l'eregede ono woru ye Chipfu l'eka; mbu woru eku phe ono nu Nnajiuphu ono, nwe mgboko l'ophu.”

*Ukwe k'onye e-shi lẹ Bẹtulehemu
bya aburu Ishi*

¹ “Sụ-a; unu chikobe onwunu nọo l'ophere l'ophere; unube mkpukpu ono, ikpoto nemadzu nọ ono; kele ndu ohogu unu nọ-pheakwaru unu anọ-phe. Onye-ishi Ízurelu bẹ ephe e-chikwa mgboro l'asha kẹ kpoo.

² “Obenu lẹ gubedua, bu Bẹtulehemu, nọ l'onu-egu Ifurata; mbukpokwaa g'i bu nwa mkpukpu, ha nwanshii l'ime mkpukpu nọ l'ipfu Jiuda l'ophu-a; bukwa l'ime ngu bẹ onye a-buru ishi ndu Ízurelu l'ophu e-mechaa shi futaru mu; mbu onye shiro teke ndiche noduhawaa; onye shi l'edenwede noduta ndzu.

³ “Oo ya bu lẹ ndu Ízurelu bẹ aa-gwobe gbiriri jasụ teke nwanyi ono, ime eme ono l'ezeda; teme unwunna iya ndu ophuu alwapfutafua ndu Ízurelu. ⁴ Onye ono l'a-pfukporu buru onye eche aturu chee aturu iya ono. O buru Chipfu a-nu iya ike; bya aburu Chipfu, bu Chileke iya e-me g'a kwabe iya ubvu. Ephe ebukporu; o to dudu iphe, eme phe nu kele teke ono bẹ údù iya e-jedzuru mgboko l'ophu. ⁵ O buru iya e-me ge nchi a-duru phe doo.”

Ndzota yele Ola-l'iswi

“Teke ndu Asiriya l'a-bya awuba l'ali anyi; zohaa garamugaramu azopyashi aka anyi kpuru kpushia ya ike bẹ anyi a-hota ndu eche aturu umadzu esaa yee ndu bu ndu-ishi umadzu esato g'ephe duta anyi tsoo ndu Asiriya ogo. ⁶ Ephe e-gude ogu-echi lwua ali ndu Asiriya ono; mbu l'ephe a-mi-lita ogu-echi phe gude lwua ali

Nimurodu. O buru iya a-nafuta anyi l'eka ndu Asiriya; m'ephe -byaepho bya awuba l'ali anyi wata azo garamugaramu awu ala l'oke ali anyi ono.

⁷ “Oshilokpa Jiekopu ndu ophu waru nu l'a-nodu l'echilabo ohamoha du g'iji, shi l'eka Chipfu akwa. Ephe a-du ge mini, lwaru yegeyege dugbaa dzedzedze l'eli eswa, bu ophu abudu nemadzu be o no ele enya iya; ophu o dudu onye o no ngaberu. ⁸ Oshilokpa Jiekopu ndu ophu waru nu l'a-nodu l'echilabo ndu-ohozo buru oduma, no l'echilabo anu-egbudu; mbu l'ephe a-du ge nwa oduma, ephe l'aturu gharu eghirigha, abujeru o -nodu eje l'oolajashi iphe, o guderu; ophu o dudu onye aduje ike dzoo iphe, dabaru iya l'eka. ⁹ Ndu ohogu ngu be ii-mekpekota; li chi-lia eka imeli tua okoo. Ozo bu le ndu gu l'ephe duru l'opfu be ee-mebyishikota.”

¹⁰ Wakwa iphe, Chipfu epfu baa: “O -rwua mboku ono be mu e-gbushi inya unu bya akupyashia ugbo-inya unu. ¹¹ Mu e-mebyishi mkpukpu, dugbaa l'ali unu bya etsukposhia ulo-mgbobuta unu g'o ha. ¹² Mu e-mebyishi k'eme mgbashi ono, unu eme ono; ophu ndu jibya aduedu l'echilabo unu. ¹³ Mu e-mebyishi ntekpe ono, unu pyishiru agwa agwagwa ono; bya emebyishikwapho mkpuma mkpuma ono, unu agwa agwagwa, dugbaa l'echilabo unu ono; ophu unu ephozebaeduru iphe, unu gude eka unu mee ozobaa. ¹⁴ Mu abya alwua nshi Ashera ono, no l'echilabo unu ono; woru mkpukpu unu l'opfu tsukposhia. ¹⁵ Mu egude oke ehu-eghu mu melata ohamoha ono, jikaru l'ephe tee medu

iphe, mu sūru g'ēphe meje ono.”

6

Eeku Ndu Ízurelu Ikpe

¹ Unu ngabekwa nchì l'olu Chipfu.

Gẹ gube Chipfu gbeshi pfuru apfuru pfua iphe, e meru ngu l'iphu eze úbvú! G'úbvú úbvú nūmawaro iphe, oome g'o pfua! ² Unubẹ úbvú úbvú; unu nūmakwa iphe, Chipfu abya edodo! Unu ngabẹ nchì nūma iphe, ada nū; unubẹ itso, gude mgboko jasuru asuru! Noo kele ọ dūru iphe, Chipfu epfu lẹ ndibe iya meru iya; mbụ l'ọ dūru iphe, ọogushi lẹ ndu Ízurelu meru iya.

Ọnu, Chipfu eye

³ “Sụ-a; ndibe mu; ?Būnaa gūnu bẹ mu meru unu? ?Bụ ivu-erwa gūnu bẹ unu a-sụ lẹ mu boru unu? Unu sanaa mu iya! ⁴ Mu dufuwaru unu l'alì Ijiputu; bya agbafuta unu l'alì ono, unu shi nọdu bụru ohu ono. Mu zia Mosisu sụ g'ọ bya edua unu; yefua Erọnu; yee Miriyamu. ⁵ Unubẹ ndibe mu; unu nyatakwa idzu, ọ chiru; mbụ eze ndu Mówabu, bụ Belaku! Unu anyatakwapọ ọnu, Belamu yeru; mbụ nwa Beyọ! Unu nyatakwa ije, unu jeru e -shi lẹ mkpukpu Shitimu jasụ lẹ mkpukpu Gilugalu; k'ophu unu a-maru iphe, Chipfu meru gude dzọta unu!”

⁶ ?Bụ gūnu bẹ mu e-gude bya l'iphu Chipfu; mbụ bya ephozeru Chileke ono, parụ ẹka apaa ono? ?Bụ anụ bẹ mu e-wota bya l'atatiphu iya gẹ mu gude iya gweeru iya ngweja-akpo-ọku; mbụ

nweswi mgbapha? ⁷ ?Oo-du Chipfu ree me a -
nu iya unu-kuru-unu ebili; nu iya nggele manu,
aso gborogboro unubuku ugbo iri? ?Mu e-wota
okpara mu gude gwaa Chileke gwefu atupya, mu
tupyaruru iya to; mbu ge mu woru nwa, shi mu
l'ehu pfua ugwo iphe-aji mu?

⁸ O goshiakwaru gube nemadzuru iphe, du ree
k'ememe. ?Bukwanu gunu bu iphe, Chipfu ele
anya iya l'eka ngu, abudu g'i meje umere, pfuru
oto; l'i yee anya l'aphu obu-imemini; l'i woze
onwongu ali; etso Chileke ngu.

Ikpe, nmaru ndu Izurelu yee iphe, ee-me phe

⁹ Unu ngabekwa nchi! O kwa Chipfu eku ndu
bu le mkpukpu oku; teme atsu gube Chipfu ebvu
bukwanuru mmamiphe. "Unu numakwa iphe
echachi ada; yee olu onye echi iya nu! ¹⁰ Unube
ndu ajo-iphe; ?bu ge mu zohaa eku ono, unu
kparuru l'uzo eregedede ono to; yee nwamkpirikpu
nkweka bu iphe, Chileke turu onu? ¹¹ ?Mu kpefu
onye gude iphe, aatuje iphe l'uzo eregedede ere
aswa; mbu onye vu eda, erwa iphe, no iya nu
abudu iphe, o suru l'o bu? ¹² Ndu nweru iphe,
bu le mkpukpu ono emeje ndu ozo mkpawere.
Ndu bu iya nu bu ndu ntuphu-ire; teme epe
nodu egudeje ire phe epfu opfu l'eregedede. ¹³ Noo
g'o gude mu watawaa emebyishi gube mkpukpu
ono; mbu eme ge mu gwepya ngu; kele imeje
iphe-aji. ¹⁴ Nri be ii-rikwa; ole epho tee jidu
ngu. I -richaa epho egheluru ngu-a onu. I -
kpachaa eku dobe; o to dudu ophu adu nu; kele
ophu i doberu g'o phodu be bu ogu-echi be ee-
gude lwua ya. ¹⁵ Ii-koebekpoo iphe l'ali; ole i tii

kpatadu iya. Akpuru oshi olivu be yi-zoshikwa; ole i ti nyidu manu iya. Ii-pyishikwapho akpuru-vayinu; ole i ti ngudu mee ya. ¹⁶ Kele unu mewaru iphe, Omuri suru g'unu meje; bya emekota iphemiphe, ndibe Ehabu anoduje eme; teme unu byakwapho etsoru omelali phe. Noo g'o gude mu je l'aha gube mkpukpu ono g'i buru ochobu; bya emee ndu bu ngu nu g'ephe buru ndu aachi ochi. O buru unu be ndiphe a-nodu ata uta."

7

Aphu ndu Izurelu

¹ O kwa aphu tsoru mu; kele mu du g'onye egu agu le teke a wochaaru akpuru oshi l'onanwu; bya awochakwapho akpuru vayinu. Ophu o duedu tiyotiyoo akpuru vayinu ono, dukwadu nu, aa-wota ria eriri. Ophu o dukwapho akpuru, dukwadu l'oshi figu, bu ophu agushikpoo mu ike. ² Su-a; ndu yeru Chileke obu laakwaru l'iswi l'eliphe-a. Mbụ l'ọ tọ duedu g'ọ ka mma l'ọo onye lanu, bu onye obu iya guru iphoro, phoduru nu. Onyemonye buepho iphe, o kwageberu akwagebe iya bu g'egburu ochi. Onyenonu gude ugbu-egege ege ge ya nmata nwune iya. ³ Eka phe ebo ebo be eme ejo-iphe kwowaru eh. Ndu bu onyibe me ndu-ikpe ekebeje g'a nu iphe-uphalazu. Ndu bu o-kari-eka nodu anataje iphe, guru phe nu l'okpehu. G'ephe ha nodu anoduje achi idzu lanu. ⁴ Onye gbẹ kachakpoo ree l'ime phe adzu g'obvu. Onye ophu kachaa abu onye obu iya guru iphoro ka ikpo ogara-mbo eji.

Eswe mbọku ono, ndu nche unu shi pfuta opfu iya ono rwuakwaru; mbụ mbọku, Chileke a-nụ unu aphụ. Ọ kwa nta-a bụ teke aa-tụ unu ẹberebete. ⁵ Unu ta adakobekwa nemadzu ibe unu! Ọphu unu achijekwaru ọpfu ye l'onye unu l'iya eshi ọnyà! Mbụkponu nwanyị ono, zẹ tų-kobe ngu ishi ono; makwaru udu opfu, iipfu eyeru iya! ⁶ Noo kele nwa ta akwabejedu nna, nwuru iya nụ ụbvù. Nwa nwanyị nọdu etsoje ne iya opfu. Nwa nwanyị, aalu alulu nọdu etsoje ne ji iya opfu. Mbụ lẹ ndu bụ ọgu duru nemadzu bụ ndu ẹphe l'iya bu l'unuphu.

⁷ Obenu lẹ mbedua a-nodunupho ele ẹnya Chipfu. Mu a-kwaberu Chileke, bụ Onye ndzota mu. Mbụ lẹ Chileke mu a-numa-a olu mu.

Ndu Ízurelu a-gbeshia ọzo

⁸ Unube ndu ọhogu mu; unu te etekwa ẹswa kpua mu! A makwaru-a lẹ mu daru iko; ọle mu a-gbalihukwaa ọzo. A makwaru-a lẹ mu nọ l'ọchii; obenu l'ọo Chipfu a-buru ìphóró, duru mu nụ. ⁹ Eshinu mu meru Chipfu iphe-ẹji bẹ mu e-vutanu oke ẹhu-eghu iya vuru; gbiriri jasụ teke ọo-bya elee ẹnya l'opfu ẹhu mu; meeru mu iphe, rwuberu mu nụ. L'ọ bya edufuta mu dobe l'ẹka ìphóró dụ. Mu ahuma g'oo-gude dzota mu. ¹⁰ Noo teke ọhogu mu ono a-humakwa iya pho. L'o woru ẹka kpube l'iphu l'ẹka iphere e-gude iya. Mu egude ẹnya mu huma ẹka ọoda kpurumu kpurumu; mbụ onye ono, shi asuje mu: “?Denu Chipfu, bụ Chileke ngu?” Ọ tọ dudu g'aa-nọ-beru l'a zọo yẹbedua ọtilitoli g'onye azọka ẹpuchi oma gbororo.

11 Eswe mboku, aa-kpukwa igbulọ ngu ono abyaakwa. Mbụ mboku, ee-me g'oke alì ngu kporiberu. 12 O -rwua mboku ono bẹ ndibe ngu e-shijechaa Asiriya abyapfuta ngu; mekpoo ndu e-shi l'iphe, bụ mkpukpu, nọ l'alì Ijiputu; mbukpoo e-shi l'alì Ijiputu jasụ l'enyimu Yufurétisu; eshi l'eze-enyimu ọwa-a jasụ l'ozo; eshi l'úbvú ọwa-a jasụ l'úbvú ozo. 13 Eliphe l'ophu aburu ochobu; ọ buru ndu bu iya nụ a-kpa iya; kele ephe a-ghota akpuru-iphe, ephe eme.

Epfu anụ Chileke aja iya ajaja

14 Gudenụ oshi-ereee ngu chee ndibe ngu g'onye eche aturu; mbụ ndu ono, bụ okiphe ngu ono, bụ ndu ophu bu nwẹkinyi phẹ l'ime ọswa; l'alì, zeru ẹswa nri eghu yee aturu ono. G'ephe nọdunu l'alì Beshanu yele alì Giladu je ataa nri g'o shi dūhawaa teke ndiche ono.

15 “Ọ kwa egube iphe, dū biribiri, mu meru goshi teke ono, unu shi lẹ Ijiputu futa ono bụ gẹ mu e-me iya goshi phẹ nta-a!” 16 Ọhamoha ahuma iya; iphere egude phẹ. L'a nashichaa phẹ ike phẹ l'ophu. Ephe eworu ẹka dẹ l'onu. Nchi echihu phẹ; ephe awata ada nkuchi. 17 Ephe egude ire richaahaa urwuku g'agwo; mbụ g'unwu iphe, awu l'epho. Ephe eshigbaa l'eka ephe kpuru futa aphugbaa ke kwekweekwee. Ephe egude ndzu-agugu ghakobechaa byapfutashia Chipfu, bụ Chileke anyi. Ephe awata unu atsụ ebvu.

18 ?Bụ onye dūbaa gẹ gube Chileke, bụ onye aguje nvu l'iphe-eji; teme i nọdu eleghatajẹ emeswe, nwa ndu ono, phoduru nụ ono,

mesweru ngu; mbụ ndu ono bụhukwapho okiphe ngu ono? Ehu te eghujedu ngu egbu jasụ l'ojejoje. Obenu l'iphe, aduje ngu ree bụ g'ị phụa obu-imemini. ¹⁹ Ii-phuru-a anyi obu-imemini ozo. Iphe-eji anyi bẹ ii-mechaa zopyashia l'okpa. Mbụ woru ejo-ememe, anyi emekota vuru je echie l'eze-enyimu. ²⁰ Lii-meru oshilokpa Jiékopu ire-lanụ; mbụ phụaru oshilokpa Ébirihamu obu-imemini, bụ iya bụ angụ, i riru nna anyi oche phẹ teke ndiche ono.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d